

Malaysia tidak perlu pelan kontingensi ekonomi, kata Najib
Malaysian Insider
Mac 8, 2016

Malaysia tidak perlukan sebarang pelan kontingensi ekonomi ketika ini kerana negara mempunyai fundamental yang semakin baik selain langkah pengubahsuaian Bajet 2016 yang menunjukkan kesan positif.

Perdana Menteri Datuk Seri Najib Razak berkata keputusan itu berdasarkan kepada perkembangan harga minyak dunia yang menjadi petunjuk utama kepada belanjawan negara.

"Indikator ini yang paling sensitif kepada belanjawan negara...seandainya harga minyak dunia jatuh dengan mendadak bawah AS\$30 setong secara konsisten, bukan sehari dua...seandainya harga minyak jatuh pada AS\$20 setong secara konsisten, pada masa itu kita akan laksana pelan kontingensi," katanya ketika menjawab soalan tambahan Datuk Wan Mohammad Khair-il Anuar Wan Ahmad (BN-Kuala Kangsar) di Dewan Rakyat, hari ini.

Najib berkata ketika ini harga minyak semakin kukuh iaitu pada purata AS\$40 setong, lebih tinggi berbanding andaian AS\$30.00 hingga AS\$35.00 setong yang dibuat ketika Pengubahsuaian Bajet 2016, pada 28 Januari lepas.

Menurutnya, kedudukan nilai ringgit juga semakin baik iaitu pada kadar RM4 berbanding AS\$1 dan kerajaan akan terus memantau keadaan semasa.

Menjawab soalan asal Wan Mohammad Khairil Anuar, perdana menteri berkata pengubahsuaian Bajet 2016 adalah lebih kepada penyesuaian aliran tunai dengan mengagihkan semula peruntukan sesuatu projek atau program pembangunan.

"Kerajaan tidak membatalkan atau mengurangkan projek yang diluluskan," katanya.

Beliau berkata, walaupun negara berdepan dengan pengurangan hasil ekoran kejatuhan harga minyak mentah dunia, kerajaan akan memastikan perbelanjaan dibuat secara optimum serta pelaksanaan program dan projek berimpak tinggi akan diteruskan.

Selain itu, katanya, Kementerian Kewangan pada 1 Mac mengeluarkan satu garis panduan arahan mengenai langkah mengoptimumkan perbelanjaan kepada semua ketua jabatan dan agensi untuk mengurus dan menyusun semula sumber kewangan masing-masing agar sesuai dengan agenda nasional. – Bernama, 8 Mac, 2016.

Copyright © 2015 Edge Insider Sdn Bhd

Source:

<http://www.themalaysianoutsider.com/bahasa/article/malaysia-tidak-perlu-pelan-kontingensi-ekonomi-kata-najib>